



Sud Bosne i Hercegovine
Суд Босне и Херцеговине

Broj: S1 3 Iž 031868 19 Iž
Sarajevo, 11.03.2019. godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo kao predsjednika vijeća, Vesne Trifunović i Dinke Bešliagić Čovrk kao članova vijeća, odlučujući o žalbi Mirsada Dizdara iz Goražda ul. Edina Plakala br. 4, izjavljenoj protiv odluka Centralne izborne komisije Bosne i Hercegovine broj: 06-01-07-1-95/19 od 05.03.2019. godine, o dodjeli mandata delegatu u Domu naroda Parlamenta Federacije Bosne i Hercegovine, u nejavnoj sjednici održanoj 11.03.2019. godine, donio je

R J E Š E N J E

Žalba se odbija kao neosnovana.

O b r a z l o Ź e n j e

Odlukom Centralne izborne komisije Bosne i Hercegovine broj i datum naveden u uvodu, dodijeljen je mandat delagata u Domu naroda Parlamenta Federacije BiH iz reda srpskog naroda Bosnić Nikici kandidatu sa liste političkog subjekta Srpska lista BiH za Skupštinu kantona 10 za Opšte izbore 2018. godine.

Poslanik u Skupštini Bosansko-Podrinjskog kantona Goražde Mirsad Dizdar izjavio je žalbu na odluku o dodjeli mandata delegatu u Domu naroda Parlamenta FBiH navodeći da je osporavanom odlukom mandat dodijeljen delegatu koji nije izabran za poslanika u kantonalnoj skupštini. Odlukom je onemogućeno predstvanicima srpskog naroda u Skupštini Bosansko -podrinskog kantona da budu birani u Dom naroda Parlamenta Federacije BiH. Ovo iz razloga jer je prije donošenja osporavane odluke, zbog podnesene ostavke poslanika u skupštini Bosansko-podrinskog kantona Džihanović Nudžeim CIK, mandat dodijelio žalitelju koji je mandat prihvatio prije nego što je CIK donio Kritrije. Dakle, žalitelj je u tom trenutku bio jedini predstavnik srpske nacionalnosti u svim kantonalnim skupštinama kome nije dodijeljen mandat u Domu naroda Parlamenta Fedreacije BiH. Ožalbena odluka, a i sami Kriteriji i postupak popune nedostajućih kandidata u Domu naroda Parlamenta BiH prekršili su odredbe Izbornog zakona i Uputstva o postupku provođenja posrednih izbora za tijela u vlasti u BiH. Stoga predlaže da se osporavana odluka poništi.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbaci kao nedopuštenu jer je izjavljena u ime Skupštine Bosansko podrinskog kantona i jer osporava normativni propis na kome se zasniva ožalbena odluka. U suprotnom predlaže da se žalba odbije kao neosnovana jer je osporavana odluka donesena na pravilan način i u skladu sa odredbama Izbornog zakona BiH i podzakonskih akata donesenih

u cilju provođenja zakona. Ukazuje da izbornim normativom nije predviđeno dopunsko kandidovanje u postupku provođenja posrednih izbora, a i da jeste žalitelju ne bi mogao biti dodijeljen mandat jer se na lokalnim izborima 2016. godine izjasio kao bošnjak, a za Opšte Izbore 2018. godine kao kandidat iste političke partije u obrascu se izjasnio kao Srbin.

Žalba nije osnovana.

Prema stanju u spisu predmeta, Centralna izborna komisija BiH je Odlukom o potvrđivanju rezultata posrednih izbora i dodjeli mandata za Dom naroda Parlamenta Federacije Bosne i Hercegovine dodijelila mandate za 14 delegata iz reda srpskog naroda i utvrdila da nedostaju 3 delegata iz reda ovog konstitutivnog naroda. Nadalje proizilazi da nakon procedure provedene u skladu sa članom 10.10. do 10.16. Izbornog zakona BiH nedostajući mandati nisu dodijeljeni, te je Centralna izborna komisija donijela Kriterije i postupak popune nedostajućih mandata u Domu Naroda Parlamenta Federacije Bosne i Hercegovine-Opšti izbori 2018. godine (Sl.glasnik BiH br.16/19). Na osnovu navedenih kriterija Centralna izborna komisija BiH donijela je osporavanu odluku kojim je mandat delegata u Domu naroda Parlamenta Federacije BiH dodijelila Bosnić Nikici kandidatu sa liste političkog subjekta Srpska lista.

Odredbom člana 2.9 stav 1 tačka 2 Izbornog zakona Bosne i Hercegovine Centralna Izborna komisija BiH ovlaštena je za donošenje administrativnih propisa za provođenje zakona. Primjenom ovog propisa doneseno je Uputstvo o postupku provođenja posrednih izbora za tijela vlasti u Bosni i Hercegovini obuhvaćenih Izbornim zakonom BiH (Sl. glasnik BiH br. 34/14, 90/16, 8/17, i 91/18) koje je u članu 37 stav 3 predvidjelo da ukoliko i u ponovnom raspodjeli ne budu dodijeljeni mandati donijeće se poseban akt koji će propisati način popune nedostajućih delegata.

Budući da su bili ispunjeni uslovi propisani članom 37 stav 3 Uputstva, Centralna izborna komisija BiH je bila ovlaštena za donošenje Kriterija, pa su neosnovani žalbeni navodi da je odluke o dodjeli mandata zasnovane na nezakonitom dokumentu. Nadalje, iz pobijane odluke proizilazi da je Centralna izborna komisija BiH kod dodjele mandata pravilno primjenila sve elemente propisane u Kriterijima i za odluku dala jasno i argumentovano obrazloženje, pa su neprihvatljivi svi žalbeni navodi da su pobijane odluke donesene protivno zakonu čime je neosnovan prijedlog žalitelja da se odluke ponište.

Centralna Izborna komisija BiH cijenila utvrđenja koja su postojala u vrijeme provođenja procedure ponovne popune delegata u smislu člana 10.16 Izbornog zakona, u koje vrijeme žalitelju nije bio ni dodijeljen mandat. Stoga pojedinačne promjene nastale od okončanja ponovne popune delegata do momenta donošenja Kriterija i donošenja ožalbenog rješenja, nemaju uticaja. Nadalje, da bi kandidat na kandidatskoj listi kvalifikovanog političkog subjekta bio uzet u obzir kod popunjavanja nedostajućih delegata, potrebno da je su ispunjeni svi uslovi iz člana 2 stav 1 Kriterija. Navedena odredba osim činjenice pripadnosti redu srpskog naroda propisuje tri kriterija za popunu nedostajućih mandata koji vezuje za broj stanovnika srpske nacionalnosti u kantonu i njihov procenat u odnosu na ukupni broj stanovnika, kvalifikovanost političkog subjekta koji ima kandidata iz reda srpskog naroda na listi i broj osvojenih ličnih glasova kandidata, koji uslovi moraju biti kumulativno ispunjeni. Žalbom se ne ukazuje da kandidat kome je dodijeljen mandat ne ispunjava kumulativne uslove, to navode žalbe čini neosnovanim. Naprotiv, CIK je pravilno utvrdila da je Bosnić Nikica, kandidat iz reda srpskog naroda sa liste političkog subjekta SRPSKA LISTA u Kantonu 10 osvojio 789 glasova, što u konačnici čini najveći broj ličnih glasova, kao i da ispunjava kumulativno sve naprijed navedene uslove. Pri tome Centralna izborna komisija je u izjašnjenju na žalbu pravilno ukazala da žalitelj, zbog promjene nacionalne pripadnosti u istom izbornom ciklusu, ne bi ni ispunjavao uslove za dodjelu mandata delegata u Domu naroda Parlamenta Federacije Bosne i Hercegovine iz reda srpskog naroda.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

***PREDSJEDNIK VIJEĆA
S U D I J A
Mirsada Džindo***